

SAN PABLO KARTA E'SU FXI'JNI TESALONIKA ÇXHABTEWE'SX JÏI

Tesalónika çxhabte Dxus yakh fxi'zesawe'sxtxi Pablowe'sx fxi'jni

1 ¹ Pablo yaasesa naa karta's fxi'jaçthu Silwano vxite' Timoteo txäawe'sx yakh, yakhthē'jwe'sx Tesalónika çxhabte pkhaakhena üssawe'sxtxi weçxana. I'kwe'sxa' Dxus kwe'sx Tata vxite' kwe'sxtxi jxpe'jsa Jesukristo txäawe'sx yakh txutemée wala ew fxi'zena üsi'kwe. ² I'kwe'sxtxi' Dxusa' pu'çxhina vxite' kwe'sxtxi jxpe'jsa Jesukristo, txäa pa'ga Dxus yakhçxáa mfxi'zewe.

Kristo' sxawedna kîhçxa Dxusna nwēese'jsameewe'sxtxi kastigaîna

³ Yakhthē'jwe'sx, i'kwe'sx pa'gate pejka Dxusa's weçxawa'j ji'ph yuhtha'w, txä'wē yūuni' kxulsame' naa pa'ga. Txäa pa'gatey i'kwe'sx üusuh Dxusa's yaakxnisa' een isa jwee íçxáa walaana u'ljweça', naapkaçxha' teeçxsa na'wēçxah puutx ya'peeegāhna fxi'zewa'jwa jwee íçxáa pehnana u'ljweça'. ⁴ Txäa pa'gatha'w kwe'sxa' msuuwa Dxus luuçx pkhaakhena üsnisu wēt weçxana pta'sxi' i'kwe'sx ew fxi'zeni's. Txä'wē yuukahní i'kwe'sxa' txakwe wala pkxuuni yahçena üsçxawa, Dxus yakh jxpubamée fxi'zewa'j yu'sa' wa'lmeei'kwe äate kaavxya'ja'ja'. ⁵ Dxusa' iiméh wala ewsa' na' txäasa ne' txä'wē ew fxi'zewa'ja's i'kwe'sxtxi kaavxya'ja'ja', txäa pa'ga i'kwe'sxa' pkxuuni yahçena üsçxawa txajx jxkaahna üsnite pa'ljwa'jsai'kwe.

⁶ Nawa i'kwe'sxtxi pkxuusáa yuutxi' ka'tuwa Dxus kastigāyni yuh yuutxna, ⁷ sa' i'kwe'sx nxuste fxi'zesa yuutxi' jxkaasewa'ja's üsuna kwe'sx yäl'çxa, txä'wē Jesukristo' txajx angeleswe'sx yäl'çxa cielujū kîhçxa, ⁸ Dxusna nwēese'jmeeçxa kwe'sxtxi jxpe'jsa Jesukristo's pta'sxni'swa nwēese'jsameetx kastigāyya' seena' ipx wala yakh kîhçxa txä'wē kwe'sxtxi jxkaasewa'ja's üsuna. ⁹ Txäawe'sxtxi' Dxus jxkaahna üsni tasxu txuhdeçxa bagaçxte yuhwa peena yu' Dxus yakh puutx uywa'jmeete

nxuste kastigãyni yuutxna. ¹⁰Naapkaçxha' na'wẽ kwe'sx pta'sxni's i'kwe'sx jxukaysa jxpa'gai'kwe txãa yã'jçxa vxite' Dxus luuçx jxukaysa yakh wala weçxana Jesukristo's jxpa'gasa yuune'kwe txajx sxawedna kii ente'.

¹¹Txãa sũhçxatha'w i'kwe'sx pa'gate Dxus yakh puutx we'wena nes yu', Dxusa' i'kwe'sxtxi pa'yayã'jçxa' txajx kusete jxpe'ljna nes yuukahn. Sa' txã'wẽy Dxus yakh puutx we'we'tha'w, Dxusa' i'kwe'sxtxi peeygãawa'ja's pu'vxitumée kxtey yuuçxa txãa yakh jxpubamée fxi'zewa'ja'swa jxuka pu'çxkahn, ¹²kxah kwe'sxtxi jxpe'lja Jesukristo's tuuthe'lja yuune'kwe, naapkaçxha' i'kwe'sxa' Jesukristo tuuthe'ljni yuune'kwe naasãa kwe'sx Dxus vxite' Jesukristo peeygãapa'ga yuuçxãa.

Teeçx piçthê'j iiméh seena' kazx pkalsa vxyaana

2 ¹Nawa açxha' kwe'sxtxi jxpe'lja Jesukristo kwe'sxtxi pkhakhya' kiiwa'ja's pta'sxiçthu, yakthê'jwe'sxtxi wala neewe'wena. ²I'kwe'sxa' thëymée yu'pthehna üsnuwe, isa yuhwãana sũhna üukhna, txã'wẽ Jesukristo kiiwa'l ena' ajxã'kh jini's, meeçxawa Dxusku vxyaaçxa txã'jikaja' jiwáatxna, meeçxa' Pablok txã'wẽ pta'sxkaja' jiwáatxna, nmehte' kartawa kwe'sx fxi'ljni na'wẽysaçxawa isxiinisa pa'ljawãana. ³Nawa weh yuhwa jxpubanuwe isxiini's. Txã'wẽ jxpubakahmén Kristo kiiwa'l en ahmeyna nyafxte' Dxusa's uy wëemée ahççxa txãa yakh puiiwa'l en khuë'y u'puna, naapkaçxha' teeçx piçthê'j eçxthê'j na'wẽy iiméh seena' kazx pkalsa infxiernote akhni yuua'jsawa vxyaana. ⁴Txã' kihnawa jxuka açesa yuuna Dxus yase's kxsuusni yu'sa', sa' dxuus yatte u'kaçxa kaçxhiina, adxa' Dxusthu jina jxkaajxa'.

⁵Adxa' kxtee i'kwe'sx yakh nee üsiy pta'sxthu txã'wẽ Dxusa's açesa pa'ljwa'ja's, aça' ¿yaaki'çmeekwe'? ⁶Txã'wẽ yüuwa'l en ahmeyna, txãa ewmeesa kasehwe'sxte kih txã'wẽ yupna üstewa txã'sa' jii i'kwe i'kwe'sxa'. ⁷Txãa ewmeesa' paaçte mjiiina yã'l üsa', aça' naasãa txãa ewmeesa's yupna neewesa's kutxi'ljwa'lçxãa yã'l peejxa'. ⁸Txajü isa txãa ewmeesa' aate vxyaana, nawa Jesukristo' txajx we'wenijuçxãa naa dudte ikhena, sa' peena yu' kaavxya'lja'lmeena eena' kweethna kiiini yakh. ⁹Txãa kazx ewmeesa' eçxthê'j kaahni txã'wẽ pa'ljana, txãasa kim yuhwa ajanimeesa's kaavxya'lja'lana isxiina kaypuba'ljna. ¹⁰Sa' Dxus yuwe isasa's pta'sxni's jxpa'gasameetxi' thëymée kaypuba'ljana ewmeesaçxã's kaavxya'lja'lçxa. ¹¹⁻¹²Txã'wẽ Dxus yuwe isasa's pta'sxtewa jxpa'gamée isxiina pta'sxniçxã's nwëese'pha'ga, Dxusa' txãawe'sxtxi' jxpubakahn nvxiituna vxituwa'lja yuukahn.

Ewte neeyüuwa'jsatx Dxus txhitxhnisa

¹³Nawa kwe'sxa' bagaçxtewa Dxusa's weçxawa'l jil'ptha'w i'kwe'sx ew fxi'zepa'ga. I'kwe'sxa' Jesukristo peeygãanisai'kwe, txãa pa'gatey Dxusa'

nyafxiitey txhithxku i'kwe'sx ewte neeyüwa'jsatx, aç'a' Dxus Espiritu' pkal ji'phmeesak vxitna pa'l'j yuwe ewsa's jxpa'gapa'ga. ¹⁴Txã'wẽ yuuya'k Dxusa' pa'ya yuwe ewsa kwe'sx pta'sxpa'ga, kxah kwe'sxtxi jxpe'jsa Jesukristo üsnite pa'l'jya' ãjakahn.

¹⁵Txãa pa'ga, yakthê'jwe'sx, weh yuhwa jxpubamée meswe, na'wẽ i'kwe'sx yakh üsçxa kaapiya'tha'w sa' kartatewa fxi'l'jna pta'sxtha'w txãatx peçxkanamée. ¹⁶Kwe'sxtxi jxpe'jsa Jesukristo vxite' Dxus kwe'sx Tata peeygãhçxa bagaçxte yuhwa pçuwaj'mée weçxana üswa'ja's üsku ¹⁷txãa i'kwe'sx üustxi kçxhãaçxha'jana, aç'a' kîhwa ewçxãa yüuna fxi'zene'kwe, we'wewa'l' ma'k yuu nawa ewsaçxá's puutx we'wena.

Dxus yakh mpuutxwe'wewe kwe'sxtxi neewe'wena

3 ¹Nmehte', yakthê'jwe'sxtxi na'wẽth neewe'we': I'kwe'sxwa ma'wẽkwe Jesukristo pta'sxni's weçxana jxpa'ga txã'wẽy msuuwe'sxwa jxpa'gakahn Dxus yakh mpuutxwe'wewe kwe'sx pa'gate, ²kxah nasa ewmeesa kuseju iyu'nja'w. Txã'wẽme' jxukaysa yu' Dxusa's yaakxsameeta'. ³Txã'wẽtewa Jesukristo' bagaçxte yuhwa i'kwe'sxtxi' nvxihtmée ewmeejü nwe'wena kçxhãaçxha'jana. ⁴Kwe'sx pta'sxni's na'wẽ yüuna üsi'kwe txã'wẽçxãa nes yuukahn Jesukristo' pu'çxhina süju'tha'w. ⁵Sa' Dxus peeygãani's peçxkanamée yaakxkahn, Jesukristo' kaayaki'jna nes yuuna txãa na'wẽy çxhãçxha fxi'zekahn.

Mjiiwa'l' ji'pha'

⁶Yakthê'jwe'sxtxi Jesukristo jxkaahni's neewe'weçtha'w: maa yakthê'jwa mjiiimeena sa' kwe'sx kaapiya'jni'swa kxtey yuumeena aç'a' txã'wẽsa yakha' pkhaakhenuwe. ⁷I'kwe'sxa' jii i'kwe kwe'sxa' ma'wẽ yüuna fxi'zesatewa. Kwe'sxa' i'kwe'sx yakh üsçxa', mjiiimée yu' fxi'zemeetha'w. ⁸Sa' ü'a's dukhmée yu' fxi'zemeetha'w, wejxwa en ma'k yuu kus ma'k yuu nawa wala çxhãçxha mjiiitha'w i'kwe'sx maa yuhtxwa thãasya'mée. ⁹Txã'wẽ yüu wẽemeewaça', kwe'sxa' i'kwe'sxtxi pu'çx thãasya' ãjawa'jsatha'w yu'. Nawa txã'wẽ pu'çx thãasmée mjiiitha'w, i'kwe'sxwa kwe'sx na'wẽy yüuna fxi'zekahn. ¹⁰Txã'wẽ yüukahmení kwe'sxa' kxtee üsçxa' na'wẽ yüuwa'l'ja'stha'w nvxiht: Mjiiya' wa'lsa', ü'wa'l'jme' jina. ¹¹I'kwe'sx yakh üssa maái yu' kîh yuhwa mjiiimée ewmeeçxãa fxi'zena yuwe ksuusu'jna fxi'zewa'l'ja'sçxáatx yaaki' jinatx pta'sxi'. ¹²Jesukristo jxkaahni'stha'w juuna' we'wena jxkaaja' txã'wẽ yüusatxi', kxah txãawe'sxa' çxhãçxha mjiiçxa peekx ü'wa'l'ja's uyuutxna.

¹³Yakthê'jwe'sx, i'kwe'sxa' ew yüuwa'l'j yu'sa' wa'lnuwe. ¹⁴Meeçxa' maái yu' kxtey yuumeewáatxna na'l'jina fxi'l'jaçtha'w txã'sna aç'a' maa txã'wẽ yüusateta ew jiyuçxa, txãa yakh pkhaakhenuwe, kxah thaameetxna. ¹⁵Nawa puüisáa na'wẽ yu' yuunuwe, wejxwa zhiçxkwe myu'kxpehwe, ma'wẽçxawa yakthê'ja' naa pa'ga.

Dxus yakhçxáa fxi'zewa'ja's neewe'weni

¹⁶Kwe'sxtxi jxpe'jsa Jesukristo' i'kwe'sx wēt fxi'zewa'ja's ũsuna bagaçxtewa, ewçxáa kaafxi'ze'jna. Dxus yakhçxáa mfxi'zewe.

¹⁷Pabloth txã'wē weçxana fxi'ja' adx kuseju. Adx kartatxi' txã'wēçxaçxáath adx yase's ki'pna fxi'ja', txãasath na'snawa txã'wēy fxi'ja'. ¹⁸Kwe'sxtxi jxpe'jsa Jesukristo' pu'çxhina i'kwe'sx jxukaysatx.